

刘芬《学从·序》

【编者按】《学丛》为我国综合性高等学校创办最早的文理综合性学术月刊之一。1913年7月1日创刊于陕西西安。西北大学出版部编辑出版和印刷。在北京顺治门大街秦中公寓、天津自由镜报社、上海商务印书馆、汉口商务印书馆、甘肃行政公署、西安省垣各书局和行政公署设有代派发行处。创刊号有刘芬《学丛·序》，第2期有黄福藻等《学丛·序》。共出版4期，约停刊于1914年初，虽在凡例中规定按月发刊一次，实际上相当于季刊。1990年7月，姚远发现于北京大学图书馆和四川省图书馆（见《光明日报》1990-07-21的相关报道）。

凤有毛，麟有角，识者知其为奇珍，而不知其笃生非偶也。山有榛，隰有苓，识者知其为异材，而不知其培植有自也。关中襟山带河，夙称天府，周秦汉唐之所经营，典章文物之所荟萃，名儒伟人之乘间而迭出，彪炳史籍，夔乎尚矣。列朝以降，地气南移，交通阻滞，风气闭塞，士习于固陋，农安于游惰，工流于苦窳，商困于疲滞，地瘠民贫，西北为最，而无由日跻于文明。识者曰此皆不学之过也。夫世无论古今，以教育为要，学无论新旧，以经世为归。时至今日，守旧者，空疏无用，冒托国粹之名；新进者，竞尚浮华，卒鲜专门之学，而人才日少，学风日坏，国政日非。二三君子怒焉忧之，览沧海之横流，惧斯文之或坠，出而提倡之，扩充之，阐法政之真理，树大学之先声。燕昭市骨而材骏争驰，叶公好龙而天龙下降，于是，鼙鼓洛钟，和声鸣盛，东琳西箭，集羽萃麟。课余之暇，或本心得而抒伟论，或因雄辩而发危言，笔而录之，采而辑之，名曰《学丛》。角艺争长，借资砥砺，片羽吉光，无关宏旨，将欲免屠龙之诮，而励士子向学之忱也。尚望大雅宏达进而教之。学术基于思想，发明赖乎文章，故首之以论说；规画重在实践，成法尤贵参观，故次之以纪事；治事泯争，适用法理，则判例次之；礼失求野，借镜择长，则译述又次之。然麟爪不弃，片言珠玉，时虞漏网，故以杂录终焉。嗟乎，民国新造，干济需才，世运值迍遭之秋，学术有陆沉之慨，内忧外侮，险象环生，莘莘学子，其亦覩斯编而兴起者乎。求实用，祛清谈，化党见，谋公益。改良社会，毋泥古而不通今，宏济时艰，毋见小而失大体。绵文武之遗泽，宏汉京之雅化。异日者，麟凤游于郊藪，榛苓咏于诗歌，皆将于此覩之。爰濡笔而为之序。临潼刘芬。

（姚 远）